



Ignazi Hitz-Disler

08.12.1928 - 04.03.2003

Ignaz Hitz ei naschius ils 8 da december 1928 sco secund giuven dils 14 affons da Gion Antoni Hitz e Maria Barla Hitz-Pally a Rueras.

Sco buob era el fetg segideivels vid il puresser ed en scola era el in fetg diligent scolar.

Naven da 1943 entochen 1945 ha el luvrau sco fumegli sil puresser da sia sora Julia a Steinen el cantun Sviz. Quei ei era stau la caschun d'emprender il lungatg tudestg. Silsuenter ha el empriu da calger a Turitg e serrau giu il mistregn 1949. Duront quei temps habitava el tier sia sora Onna-Maria Deflorin-Hitz a Turitg.

Duront la recruta selegrava el sin la viseta da sia mumma ch'el veva gia daditg buca viu. Mo igl ei vegniu auter. Sia carezada mumma ei vegnida malsauna ed ei morta ils 18 da december 1948.

Suenter haver luvrau cuort temps sil mistregn ha el entschiet a luvrar 1949 tier la fabrica da tschugalatas Lindt & Sprüngli a Kilchberg. Tier quella firma ha el luvrau varga 42 onns ed era nus nevs e niazas astgavan savens sentir ch'igl aug Nazi luvrava alla fontauna da tschugalatas, cun retscheiver pac da Nadal e da Pastgas. Leu ha el era empriu d'enconuscher sia consorta Berta Disler. 1950 ha Ignazi maridau la giuvna Berta a Nossadunnaun. Sia lètg ei vegnida benedida cun dus buobs, Walter 1953 e Markus 1959.

Ignazi luvrava fetg cunscienzius e sidendificava dil tut cun sia lavur. El era enconuscents sco ruasseivel, correct e fetg amicabel conlutrer. Siu temps liber passentava el il pli savens a casa vid siu hobi, il rimnar marcas. Perfin la fin d'jamna levava el baul e sefatschentava cun las marcas. Era il sport fascinava el, denton plitost sco consument che sco sportist activ. Mava el denton tuttina sin viadi era quei il pli savens encunter Tujetsch, sia patria schi carezada. El ei adina staus ligiaus fermamein cun la Val Tujetsch.

Ses dus fegl e pli tard ils 7 biadis carezava el sur tut. Ton pli gronda ei la frida stada cu el ha piars siu fegl Walter che fuva ella vegliadetgna da 49 onns ed era bab da 3 affons.

Culs onns da vegliadetgna ha ina malsogna dil fladar sefatg valer pli e pli fetg. Aschia ha el schau pensiunar igl onn 1991, dus onns avon la pensiun. Quella malsogna ha restrenschiu el bravamein. Sia dunna Berta fuva era en quei temps adina siu grond sustegn ed agid. Ella ha accumpignau Ignazi duront 50 onns entochen sia mort.

Ina particularitat dad Ignazi era ch'el era fetg generus, senuspeva denton da prender. Savens sefatschentava el cun quitaus dils auters. El mirava adina plitost per ils auters che per sesez. En sia veta ha el dau tut quei ch'el ha saviu dar ed el ha menau ina veta sempla e mudesta.

Emprender d'enconuscher, carezar, schar liber, seregurdar. Engraziar che nus havein astgau accumpignar Ignazi sin in tschancun da sia veta.

Car aug Nazi, Ti has dau bia, adina manegiau bein, Ti vegnas a star a nus en buna memoria, buca mo sco aug da tschugalatas, mobein sco ruasseivel e bien um, mudests e cun in grondius cor.

Stai bein,

Tiu figliel Mario